

MÉMOIRES
DE LA
SOCIÉTÉ HISTORIQUE
ET
ARCHÉOLOGIQUE
DE
L'ARRONDISSEMENT
DE
PONTOISE
ET DU
VEXIN

TOME XLVIII



PONTOISE
BUREAUX DE LA SOCIÉTÉ HISTORIQUE
43, Rue de la Roche

—
1939

26 avril 1582

FOI ET HOMMAGE POUR LE FIEF DU PAIN DE LA BOULANGERIE DE PONTOISE
CHEF CENS PERÇU SUR CHAQUE ESTAL A PELLETIER ASSIS AU PORCHE DE SAINT-
MACLOU, APPELÉ LE PORCHE AUX PELLETIERS.

Fut présent en sa personne noble homme Loys de la Fontaine, escuyer, seigneur de *Cormeilles-en-Veulxin*, tant en son nom que comme soy faisant fort de Phelippe de Gaillenboys aussy escuyer. seigneur de *Marcouville* et tous deux seigneurs de *Domont en France*. Lequel sieur de *Cormeilles* es dict nom a recongnu et confessé, congnoist et confesse avoir receu à foy et hommage Jehan Le Roy, marchand demeurant à Pontoise ou nom et comme tucteur et curateur des enffans myneurs de deffunct Anne Gobert et de Jehanne Langrolée sa femme, à présent

femme dudit Le Roy à ce présent, d'un tiers, les trois en tout, du fief de tonlieu (1) et coustume de pain de la boulangerie de Pontoise tenu en fief desdits sieurs à cause de leur dite seigneurie (de) *Domont* aux us et coustumes du Veulxin Le Francoys, auquel fief est deu par chacun sabmedy de chacun boulanger estant au marché de Pontoise un pain blanc de la valeur de un denier parisis payable ledit jour de sabmedy, et une maille parisis au sabmedy ensuivant. Item sur chacune somme de pain à cheval ou aultre beste de boulanger forain vendant pain audit Pontoise, tant au marché que ailleurs, un denier parisis. Et sur chacune somme de pain à col, maille parisis aussy à chacune sepmaine audit jour de sabmedy. Item à chacun estal à pelletier assis à Pontoise au porche de Saint-Maclou nommé *le porche aux pelletiers*, douze deniers de chef cens par an paiables aux octaves Saint Denis. Item seize sols parisis ou environ de chef cens par an, cest assavoir sur la maison Colin Fichon qui fust Thomas de St-Just, et à présent appartient aux héritiers Loys Le Pelletier, douze sols de chef cens, et le surplus sur aultres maisons assises à Pontoise rue du Marché à la laine, avec tout le droit de justice et seigneurie, utilité, saisine et amende à ce appartenant. De laquelle foy et hommage susdites, ensemble du relief que lesdits enffans myneurs dudit deffunt Anne Gobert estoient tenus payer ausdicts seigneurs de *Marcouville* et *Gaillerboys*, à cause de leur dite seigneurie de *Domont* pour ledit tiers en trois, à cause de l'ouverture advenue audit fief par la mort et trespas de deffunct M^{re} Pierre Gobert, ayeul desdits enffans myneurs dudit deffunt Anne Gobert, ledit sieur de *Cormeilles* esdit nom. en a quicté et quicte ledit Jehan Le Roy esdit nom, moyennant la somme de douze escus d'or sol, tant pour ledit relief que pour les despens et fraiz paiés par lesdits sieurs contre ledit Le Roy et sa femme, estans en redition de compte dudit tiers dudit fief auquel ledit déffunt M^{re} Pierre Gobert avoyt esté estably commissaire dès le XVI^e juing mil VC LIIII par Jehan Levasseur sergent, ensemble pour les fraiz dudit tiers depuis ladite saisie. Présens Samson Compaignon et Jehan Marchant, demourans à Pontoise.

Jehan MARCHANT
LEVASSEUR
De la FONTAYNE
COMPAIGNON